

**Isteri Perdana Menteri Minta Rakyat Malaysia Syukuri Keamanan Negara
Bernama
24 Julai, 2012**

KUALA LUMPUR, 24 Julai (Bernama) -- Isteri Perdana Menteri Datin Seri Rosmah Mansor pada Selasa meminta rakyat Malaysia mensyukuri keamanan dan kesejahteraan negara yang diperoleh sejak kemerdekaan dan harus dipelihara agar generasi akan datang dapat mewarisi sebuah negara yang aman dan stabil.

Beliau berkata keamanan merupakan satu kemewahan yang harus dipelihara walau dengan apa cara sekalipun supaya generasi akan datang dapat menikmatinya.

"Kita bersyukur kerana negara kita Malaysia masih terus kekal dalam keadaan aman, damai dan makmur serta kita masih bebas daripada pergolakan dan konflik serta keganasan seperti yang berlaku di sesetengah negara lain," katanya.

Rosmah yang juga Yang Dipertua Badan Amal dan Kebajikan Tenaga Isteri-Isteri Menteri dan Timbalan Menteri (Bakti) berkata keamanan yang dikecapi pada hari ini bukan datang dengan mudah dan anggota keselamatan negara merupakan benteng pertahanan yang amat penting bagi memastikan rakyat Malaysia dapat hidup dengan aman damai.

"Hasil pengorbanan pasukan keselamatan telah membolehkan pemimpin negara meneruskan usaha bagi pembangunan negara sehingga Malaysia mencapai tahap pembangunan yang sungguh menggalakkan," katanya berucap pada majlis penyerahan sumbangan Hari Raya Bakti kepada pasukan keselamatan, di sini pada Selasa.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=682725>

